



Komunikadu Imprensa
Tribunál Distritál Dili
29 Setembru 2020

Aplika pena multa ba estudante universitáriu sira:
JSMP konsidera Tribunál nia desizaun la apropriadu

JSMP konsidera desizaun Tribunál Distritál Dili aplika pena multa ba arguidu sira nu'udar estudante universitáriu na'in 32 ba krime dezobidiénsia la apropriadu. Enkuantu estudante sira ejize atu Estadu fó livre propinas durante implementasaun estadu emerjénsia (COVID-19) tanba sira hasoru problema finanseira.

Iha 15 no 18 Setembru 2020, Tribunál Distritál Dili prezide julgamentu leitura sentensa ba krime dezobidiénsia ne'ebé envolve arguidu nain 32 no kondena arguidu sira ho pena multa US\$45.00 ne'ebé kada arguidu sei selu US\$1.00 kada loron durante loron 45. Bainhira arguidu sira la selu pena multa refere, arguidu sira sei kumpri iha prizaun durante loron 30 nu'udar pena alternativa.

“Desizaun pena multa ba estudante sira ne'e, JSMP konsidera la apropriadu tanba la refleto ho situasaun arguidu sira nian nu'udar estudante ne'ebé hasoru hela problema finanseiru,” dehan Diretora Ezekutiva JSMP, Sra. Ana Paula Marçal.

Prisipalmente objetivu hosi pena mak prevensaun, eduka, represivu (fó sansaun), no rehabilitasaun ba kondenadu no sosiedade atu prevene krime no muda komportamentu iha sira nia família no sosiedade. Nune'e JSMP konsidera katak se pena nia objetivu maka hadia ka muda ema nia komportamentu, entaun pena aplikada ne'ebé tribunál aplika tenki justu no reprezenta kondenadu nia sósiu ekonómia no kapasidade atu nia bele kumpri.

Iha Kódigu Penál Timor-Leste preve pena prinsipál haat hanesan pena prizaun, pena multa, pena traballu afavór ba comunidade no pena admoestasaun. Pena sira ne'e tribunál bele eskolla tuir lei ka konviksaun juis sira nian rasik bazeia ba faktu provadu no sirkunstánsia hotu-hotu ne'ebé haleu krime ida nia tipu legál bainhira atu aplika ba arguidu sira.

JSMP intende katak intensaun tribunál halo indentifikasaun ba arguidu tuir artigu 281 nú. 1 letra (a) KPP kona-ba sentensa nia rekezitu, aleinde identifikasaun identidade, profisaun no rendimentu, tribunál atu hatene mós arguidu sira nia kondisaun ekonómia

ka sosiál ho objetivu atu tetu nu'udar sirkunstánsia nune'e bele aplika pena ida ne'ebé adekuadu ba arguidu.

Mezmu nune'e ba kazu konkretu, depoisde halo identifikasaun inklui arguidu sira nia kondisaun ekonómia no sosiál, tribunál hatene katak arguidu sira halo manifestasaun hodi ezije subsidiu ba Estadu tanba sira iha problema ekonómia (osan) atu fasilita sira nia nesesidade eskola nian hanesan mós estudante sira iha rai liur maibé ikus mai tribunál aplika pena multa ne'ebé rekere arguidu sira tenki selu osan ba Estadu.

Iha leitura sentensa tribunál prova katak arguidu sira provadu komete krime dezobidiénsia, tanba estudante sira ne'e la halo manifestasaun iha UNTL nia oin nu'udar fatin ne'ebé autoridade seguransa (PNTL) autoriza maibé halo fali iha Ministériu Ensino Superiór Siensia no Kultura (MESSK) nia oin-Kolmera, ho nune'e polísia sira detein estudante sira ne'e iha sala detensaun Polísa Kaikoli no halo prosesu julgamentu sumáriu. Iha ikus, tribunál kondena kada arguidu ho pena multa US\$45.00 ne'ebé kada loron arguidu sira sei selu US\$1.00 durante loron 45 ba Estadu. Bainhira arguidu sira la selu pena multa refere, arguidu sira sei kumpri iha prizaun durante loron 30 nu'udar pena alternativa.

Portavos Aliansa Universitáriu la konkorda ho desizaun pena multa ne'e tanba maioria estudante sira ne'ebé lori ba tribunál ne'e hotuhotu la'os mai husi família ne'ebé forti ekonomikamente. Estudante sira iha momentu ne'ebá hakarak atu Estadu halo tratamentu hanesan ho estudante sira iha rai liur no fó livre propinas durante estadu emerjénsia¹.

Aleinde ne'e, kestaun hanesan, JSMP mós kestiona desizaun pena multa iha krime sira ho natureza violénsia doméstika. Nune'e, iha tinan 2015, JSMP publika relatóriu ida ho titulu [Aplikasaun sentensa alternativa iha kazu violénsia doméstika iha Tribunál Distritál Oe-cusse-2015](#)².

Iha relatóriu ne'e, JSMP relata katak fator ekonómia hanesan fator ida husi fator barak sira seluk ne'ebé bele kontribui ba insidénsia violénsia doméstika. Iha kazu balu, vítima hetan violénsia ekonomia hamutuk ho violénsia fíziku. Porezemplu, iha kazu ida arguidu dehan nia baku nia feen tanba vítima uza US\$20 sein nia aprovasaun. Iha kazu ne'e, klaru katak arguidu hakarak kontrola osan iha uma no uza violénsia fíziku hanesan

¹ Iha 23 Setembru 2020, JSMP dada lia ho portavos Aliansa Universitáriu inklui estudante na'in 3 seluk tan kona-ba sira nia sentimentu ba iha desizaun tribunál nian ne'ebé aplika pena multa ba estudante na'in 32.

² Relatóriu JSMP ; https://jsmp.tl/wp-content/uploads/2012/05/FINAL_JSMP_Sentensa-alternativa_TDO_Nov-20151.pdf



forma kontrola. Iha kazu seluk ne'ebé JSMP monitoriza, klaru katak ekonomia família nian ne'ebé fraku sai hanesan tensaun ida no bele kontribui ba insidénsia violénsia doméstika. Maski situasaun finanseiru mak hamosu violénsia maibé iha desizaun sira tribunál aplika pena multa ba arguidu.

JSMP preokupa ho aplikasaun pena multa sein konsiderasaun kle'an liu kona-ba situasaun vítima nian. Ho nune'e, JSMP rekomenda katak tribunál presiza kuidadu bainhira konsidera atu substitui pena prizaun ho pena multa se karik pena multa bele kauza difikuldade finaseira ba vítima ka nia oan sira iha kazu VD. Iha maioria kazu violénsia doméstika, vítima kontinua hela hamutuk ho arguidu no pena multa bele fó impaktu negativu ba vítima no ninia oan sira. Ida ne'e bele dezamina vítima sira husi hato'o keixa ba tribunál.

Iha relatóriu ne'e, JSMP mós inklui hanoin balun kona-ba pena multa husi vítima violénsia doméstika na'in 3 ne'ebé foin hetan desizaun husi Tribunál Distritál Oekusi. Vítima sira hatete pena multa kria difikuldade ba ekonomia família nian no sira la kontente ho aplikasaun pena multa iha sira nia kazu tanba sira mak sei ajuda sira nia la'en (arguidu) atu buka osan selu pena multa ne'e.

Iha kazu konkritu estudante sira nian ne'e, defeza sei hasae rekursu tanba la konkorda ho desizaun tribunál primeira instansia ne'ebé kondena arguidu sira ho pena multa US\$45.00. JSMP espera katak Tribunál Rekursu sei tetu sirkunstánsia sira hotu hodi hatún desizaun ida ne'ebé adekuaudu ba arguidu sira ne'ebé ezije hela atu Estadu hakmaan sira nia osan semestre nian.

Kazu ne'e rezista iha tribunál ho Nú. Prosesu: 0198/20 DIDIL, Nú prosesu: 0199/20 DIDIL. julgamentu leitura sentensa ne'e prezide hosi Juis singulár Dra. Maria Solana, Ministériu Públiku representa hosi prokuradór Dr. Ricardo Godinho no arguidu sira hetan defeza hosi Dr. Marito da Silva nu'udar advogadu privadu.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: 3323883 | 77040735
Wesbsite: <https://jsmp.tl/>